

## **Dxihtsi nin baca'h San Pahblu loh ra' bwiinn Galacia**

### *GuelrgahpaDxiohs*

<sup>1</sup> Na'h Pahblu, naann pooxtla xteenn Jesucristu. Ayi bwiinn ra' dxi'h baxe'hla na'h nin ayi za la'h ra' dxi'h ba bazuh na'h sino que la'h Jesucristu cun Xtaada Dxiohs Ñi'h nin nuu llaa'ndxibaa'; Dxiohs nin bacwa'hn la'h Jesucristu loh ra' bwiinn guuchi, la'h Ñi'h gulii na'h gaca'hn xpooxtla Ñi'h. <sup>2</sup> Na'h nee cun garaa ra' lasaa' ra' nu'h nin naa pur xcweenta Jesucristu nin rii ra' rii', raca'h nu dxihtsi rii' para la'h ra' bwiinn guido' nin nuu ra' nez loh guiidxyi xteenn Galacia. <sup>3</sup> Gulguica'ha guelruhnntaa'yi xteenn Dxiohs nin naa Xtaada nu'h, cun guelriidxyii sto' xteenn Ñi'h neezaa xcweenta Daada Jesucristu. <sup>4</sup> La'hgahca la'h Ñi'h badi'hi Ñi'h la'h Ñi'h gucah Ñi'h loh cruhzi tin guhlda'h Ñi'h la'hnu'h loh duhlda xteenn guidxyiyuh rii', ziga gunabwa' Yu'bi Xtaada Dxiohs nu'h. <sup>5</sup> Ba lasahca duxa naa lah Dxiohs para tu'pazi. Zi'chi gaca pwihsi.

*Ayi stuhbi dxyi'dxyi nin guta'h la'h bwiinn loh duhlda ziga xchi'dxyi Dxiohs*

<sup>6</sup> ¡Hasta radxyigaa' duxa za loon ziga tan lwehgutii' cabwe'he sto' tu la'h Dxiohs nin gudihdxyi la'htu cun guelruca'h sto' nin nahpa Crixtu cun la'hnu'h, tin zeena'hla tu guriincaa dxyi'dxyi! <sup>7</sup> Ayi stuhbi dxyi'dxyi nin zahca guta'h la'hnu'h

loh duhlda, sola nuu ra' nin xclaa'dzi gusiahchi sto' tu cun stuhbi ra' dxyi'dxyi; xclaa'dzi ra' ba gucha'h ra' ba xchi'dxyi Jesucristu. <sup>8</sup> Per sidela chyuulla cagaluu'yi la'htu guriincaa stuhbi dxyi'dxyi nin rñi' ra' ba ruta'h la'h bwiinn loh duhlda, dxyi'dxyi nin ayi naa lasaa' dxyi'dxyi nin ba baluu'yi nu loh tu; bwiinn chi ya guyuu'dii ba, ayi xi ruhnn nicala na'hzahn, o tuhbi aanjla nin dxiinloh nez dxibaa'. <sup>9</sup> La'n guñi' lan desde galohyi, yannah la'n cañi' la'ga'hn stuhbi: Sidela chyuulla ruluu'yi la'htu stuhbi dxyi'dxyi nin rñi' ba rta'h la'h bwiinn loh duhlda, nee ayi naan ziga dxyi'dxyi nin ya baluu'yi nu la'htu, bwiinn chi ya guyuu'dii ba.

<sup>10</sup> Chin rñi'n squii', ¿ta rluu'yi xclaa'dzihn guiñi' za'ca bwiinn xcwee'ntahn?, o ¿ta cadxi'hyihn nez gusia'xihn la'h bwiinn ra'? Pwihsi sidela na'h ñi'dxi'hyihn nez sola ñusia'xihn la'h ra' bwiinn, pwihsi ayi ñahca'hn tuhbi xmooza Jesucristu.

### *Xcweenta xtsi'n Pahblu*

<sup>11</sup> Per gulgahcabwa' dee' bwiitsi ra'n; dxyi'dxyi nin ruta'h la'h ra' bwiinn loh duhlda nin rulu'yi'hn la'h tu, ayi naa ra'n xigaaba ra' bwiinn guidxyiyuh. <sup>12</sup> Ayi loh ra' dxi'h bwiinn guidxyiyuh bwi'hna'hn guca'hahn dxyi'dxyi ra' rii', nee nin ayi za chy baluu'yn na'h, sola la'h Jesucristu bani'hi xchi'dxyi Ñi'h rii' na'h.

<sup>13</sup> La'htu ya naann tu xa za'bi dxyi'dxyi xa guhca'hn cadxyih, chin gwazahne'hn xlehyi guehtu Moisehs, pwihsi basa'cazii duxa'hn la'h ra' bwiinn guido' ra' nin gwachii sto' ra' ñi'h xchi'dxyi Jesucristu, nee guclaa'dzihn ñuñi'chilooran ba.

14 Loh ra' nin ruzo'badxiahga xlehyi guehtu Moisehs, na'h guhca'hn tuhbi bwiinn nin mahziru gucabwa' ziga naa xlehyi Moisehs loh ra' lasaa' ra'n nin naa xedah ra'n; guhcabwa'ruhn loh ra' ba, loh ra' bwiinn laadxyihn; mahzi ru guza'bi sto'n costumbre ra' xtaadaguldoo' ra'n. 15 Per Dxiohs gulii na'h nee gulii Ñi'h na'h desdeyi chin nuu'huhn sto' xmaa'n, ni'chin gudihdxyi Ñi'h na'h pur tantu nin ruca'h sto' Ñi'h na'h. 16 Chi'chi bwi'hnn Dxiohs para biu'nbwa'n la'h Llii'n Ñi'h, tin zi'chi gulu'yi'hn xcweenta xchi'dxyi Ñi'h nin guta'h la'hra' bwiinn loh duhlida nez loh ra' bwiinn ra' nin ayi naa ra' bwiinn Israel. Chin guhca zi'chi, ayi chyu bagati'dxi dzi'na'hn, 17 nin ayi za guyaa'hahn loh guihdxyi Jerusalehn para ñagaanñin loh ra' nin naa ra' pooxtla galohyi que na'h. Pwihsi mahzi na'h guyaa'hahn nez loh guihdxyi Arabia, ya chi'chi gubia'gariin para nez guihdxyi Damascu.

18 Ya chin guhca chohnna yihza, chi'chiyi guyaa'hahn loh guihdxyi Jerusalehn, ya chi'chiyi biu'nbwa'n la'h Pehdru, nee guyuu'huhn tsi'ñu gubihdxyi ri'chi, 19 per ayi bwa'hahn loh nin stuhbi chyu stuhbi ra' pooxtla ri'chi, sola la'h si Jacobo bwihtsi Jesucristu bwa'hahn. 20 Pwihsi na'pahn siguhra nez delaanta loh Dxiohs, ayi naa xchi'dxyi'hn dxyi'dxyi xihn, sino que guchii naa nin cagaca'hn. 21 Chi'chi guyaa'hahn loh ra' guihdxyi xteenn Siria, cun neezaa nez loh guihdxyi Cilicia. 22 La'h ra' bwihtsi ra' nu'h nin naa xpwiinn guido' Crixtu nin nuu ra' nez loh guihdxyi ra' xteenn Judea la'n dxyih ra' chi, ayi

nu'nbwa' ra' ba na'h ziga xa rñiaa'hahn, <sup>23</sup> sola guyaa'zi dxiahga ra' ba rahbi ra' bwiinn: “Ni'ca nin guca'hna'hla la'hnu'h, nee nnah bwa'ha la'h ba cagaluu'yi xchi'dxyi Jesucristu, nee dxyi'dxyi ra' ca nin guclaa'dzi ba ñuñihchiloh ba.” <sup>24</sup> Ya chi'chi riiñi' za'ca duxa ra' ba xcweenta Dxiohs nin nuu dxibaa' laasii gwachii sto' Zahn xchi'dxyi Ñi'h.

## 2

### *Bidxa'ga Pahblu loh ra' pooxtla*

<sup>1</sup> Chin guhca tsi'dah yihza, chi'chi guyaa'hahn stuhbi nez loh guihdxyi Jerusalehn cun Bernabeh, neezaa Titu gwane'hehn. <sup>2</sup> Guyaa'hahn laasii Dxiohs baluu'yi na'h nahpa guyaa'hahn tin balu'yi'hn xa gwachii sto' ra' bwiinn ra' nin ayi naa ra' bwiinn Israel xcweenta xchi'dxyi Jesucristu nin ruta'h loh duhlda. Balu'yi'hn dxyi'dxyi ra' rii' loh ra' nin rnabwa' guido' xteenn Jesucristu ri'chi; bwi'hinna'hn squii' laasii ayi xclaa'dzihn ñahca nin bwi'hinna'hn cun nin cayu'nnahn dzi'n lliaa'si, <sup>3</sup>per nin la'h Titu, nin ze'ldane'hn, nin naa tuhbi bwiinn griehgu nin ayi naa tuhbi bwiinn Israel, ayi guyuu' chyu ñuhnn jwersi ñuu' bi bwa' tihxi bi ziga nin caa loh xlehyi Moisehs nahpa chuu bwa' tihxi bwiinn nin guzo'badixahga lehyi chi. <sup>4</sup>Pwihsi guchii nuu ra' bwiinn ra' nin ruhnn ra' zi ziga naa ra' ba lasaa' ra' nu'h; bidxa'ga ra' ba loh ra' nu tin guhlda'tsi ra' ba xa raann ra' nu'h Dxiohs. Rdxyi'chi ra' ba laasii naa nu'h xpwiinn Jesucristu, ya ayi chyu ruhnn ziga bwi'hnn ra' xtaada guldoo' ra' nu. La'h ra' ba xclaa'dzi ra' ba guche'h ra' ba yihca ra' nu, xclaa'dzi ra' ba gazo'badixahga

ra' nu'h xchi'dxyi ra' ba. <sup>5</sup> Per la'hnu ayi chyu bazo'badxiahga xchi'dxyi ra' ba, laasii xclaa'dzi nu cheezah chechii sto' tu xchi'dxyi Jesucristu nin ruta'h la'h bwiinn loh duhlda.

<sup>6</sup> Pwihsi nin tuhbi dxyi'dxyi cuubi ayi guñi' ra' nin naa ra' bwiinn dzi'baloh ra' chi loon; nicala na'h ayi radxyigaa'hahn chyuullaa guhca ra' ba galoh laasii Dxiohs ruhnn chi'h zi Ñi'h tuhbiloh loh garaa ra' bwiinn. <sup>7</sup> Loh nin ñuni'hi ra' ba tuhbi dxyi'dxyi cuubi na'h, mahzi bwa'ha ra' ba Dxiohs baca'bi na'h para gulu'yi'hn xcweenta xchi'dxyi Dxiohs nez loh ra' bwiinn ra' nin ayi naa ra' bwiinn Israel, ziga za baca'bi Ñi'h la'h Pehdru tin ruluu'yi ba xchi'dxyi Dxiohs nez loh ra' bwiinn ra' nin naa ra' bwiinn Israel. <sup>8</sup> Pwihsi la'h gahca Dxiohs nin guxe'hla la'h Pehdru ziga pooxtla nez loh ra' bwiinn Israel ra', la'h gahca Dxiohs chi guxe'hla za na'h ziga tuhbi pooxtla nez loh ra' bwiinn ra' nin ayi naa ra' bwiinn Israel.

<sup>9</sup> Ni'chin ziga Jacobo, Pehdru, cun Jwahn nin naa ra' bwiinn dzi'baloh ru loh bwiinn guido' ra' xteenn Jesucristu nez Jerusalehn, guhcabwa' ra' ba la'h Dxiohs cayuhnn cayahcanee na'h, chi'chi bani'hi naa ra' ba tin bagahpaDxiohs ra' ba na'h cun neezaa Bernabeh, tin sehn rii' ruluu'yi naa ra' ba tuhsi cun la'hnu ziga choodi'hnn nu dzi'n nez loh ra' bwiinn ziitu ra' nin ayi naa ra' bwiinn Israel ra' ya la'h ra' ba dxia'han ra' ba guluu'yi ra' ba la'h ra' bwiinn Israel ra'. <sup>10</sup> Cun sola gunaaba ra' ba loh nu gachidxiaacanee nu la'h ra' bwiinn prohbi ra', nee lligaaba pa'h za rii' nuu'huhn.

*Pahblu gudxi'ldxinee dxyi'dxyi la'h Pehdru loh*

### *guihdxyi Antioquía*

<sup>11</sup> Per chin gwah Pehdru nez loh guihdxyi Antioquía, chi'chi basi'xtuhyihn la'h ba, laasii ziga cayuhnn ba ayi naa bwen ni'chi, <sup>12</sup> pwihsi galoh tuhbi loh mweella gudahwnee ba la'h ra' bwiinn ziitu ra' nin ayi naa ra' bwiinn Israel, per ya chin badzihn paaldaa ra' bwiinn ra' nin guxe'hla Jacobo, chi'chi dxyigahsi biria'caa ba nez loh ra' bwiinn ziitu ra' chi, ya ayi ru gudahwnee ba la'h ra' ba, laasii guyuu' guelrzaa' ba la'h ra' bwiinn Israel ra' nin badzihn ri'chi nin ze'nee bwa' nin laa circuncisión. <sup>13</sup> Ya na'zu gahca ra' garaa ra' bwiinn Israel ra' nin naa tuhsi cun Pehdru xmahn Pehdru nee ra' ba guhca chiohpa loh xigaaba ra' ba hasta nee Bernabeh bwi'hnn zi'chi. <sup>14</sup> Per chin bwa'hahn ayi zeezahnee ra' ba ziga naa xchi'dxyi Jesucristu, chi'chi ra'pihn loh Pehdru delaanta nez loh ra' garaa ra' bwiinn guido' ra': “Sidela yi'h nin naa lu'h tuhbi bwiinn Israel, nuu nabahan lu'h ziga zi tuhbi bwiinn nin ayi naa bwiinn Israel ayi ziga dxi'h bwiinn Israel, ¿xixnaa chi'h xclaa'dzi lu'h guibahan ra' bwiinn ra' nin ayi naa ra' bwiinn Israel ziga zi bwiinn Israel?”

*Bwiinn Israel ra' cun garaa ra' za ra' bwiinn, nahpa chechiisto' ra' xchi'dxyi Jesucristu tin chaptii xtuhlda ra' ba*

<sup>15</sup> Ra'pizahn loh ba: “Bwiinn Israel ra' nu'h desde chin guulaayi ra' nu'h, ayi bwiinn duhlda dxi'h ziga naa ra' bwiinn ziitu ra'. <sup>16</sup> Ya naann nu'h ayi tuhbi bwiinn nin chaptii' xtuhlda ñi'h chin guunn ba ziga nin caa loh lehyi, sino que sola chechii sto' nu'h xchi'dxyi Jesucristu. Ni'chin nin gwachii sto' nu'h xchi'dxyi Jesucristu tin guzia'tii

Ñi'h xtuhlda nu'h laasii nin riachii sto' nu'h, ayi pur nin rihnn dxi'h nu'h nin caa loh lehyi. Pwihsi ayi nuu guzia'tii' lehyi xtuhlda bwiinn ziga sola guzo'badxiahga ba xcwenta si ziga naa xlehyi guehtu Moisehs."

<sup>17</sup> Pwihsi loh ziga nin xclaa'dzi nu'h dxiaa xtuhlda nu'h xcweenta guelriachii sto' la'h Jesucristu, sidela raluu'yi nu'h dxuudi'hnn ru nu'h duhlda, ¿ta zahca gachiñi' nu'h: "Jesucristu ru-luu'yi zahca guidi'hnn ru nu'h duhlda"? ¡Ayi gaca zi'chi! <sup>18</sup> Pwihsi sidela na'h gutsiiyihn xiilla ya lwehgu gahca dxiu'nza'cañin, pwihsi naan tuhbi bwiinn duhlda, <sup>19</sup> laasii cun xcweenta lehyi la'n naa ziga zi tuhbi bwiinn guuchi. Pwihsi ayi ru nuu guinabwa' lehyi na'h laasii nnah nabahanahn loh xneziuh Jesucristu. Pwihsi la'h gahca lehyi bwi'hnn naan ziga zi tuhbi bwiinn guuchi chin guhcabwa'n ayi nuu guzo'badxiaagahn garaa nin caa loh lehyi. <sup>20</sup> Pwihsi naan ziga zi nin guhchinee la'h Jesucristu loh cruhzi, pwihsi ni'chin nnah ayi ru naan na'h nin nabahanahn sino que Jesucristu naa nin nabahan nez la'n lasto'n, ya guelnabahanahn nin nabahanahn loh guidxyiyuh rii' nabahanañin pur nin riachii sto'n xchi'dxyi Llii'n Dxiohs, nin baca'h sto' Ñi'h na'h ya guhchi Ñi'h loh cruhzi xcwee'ntahn. <sup>21</sup> Pwihsi na'h ayi xclaa'dzihn cwe'he sto'n xquelralahsa sto' Dxiohs, per sidela zahca gusiaa lehyi xtuhlda bwiinn tin gaca ba bwiinn nayaa nez loh Dxiohs, ya chi'chi lliaa' zi guhchi Jesucristu.

*Guelriachii sto' rusiaa duhlda*

<sup>1</sup> ¡Ayy bwiinn Gálatas ra', xipa'h bwiinn nahda tu! ¿Chyulla bache'h la'htu, tin ayi ru guzo'badxiahga tu xchi'dxyi Jesucristu? ¡Nee nez loh pa'h tu bwii'yidxyi'dxyi nu xa gucah Jesucristu loh cruhi! <sup>2</sup> Pwihsi nnah tuhbi si dxyi'dxyi xclaa'dzihn guiñi' tu loon: ¿Ta guyuu'tii' Spíritu Saantu sto' tu pur cun sola bazo'badxiahga tu nin caa loh lehyi, o pur nin gwachii sto' tu dxyi'dxyi nin bihn dxiahga tu? <sup>3</sup> ¡Xipa'h dxiipa naa sto' tu! ¿Xa guzo'baloh chi'h tu ziga guca'ha tu Spíritu Saantu Dxiohs nee nnah xclaa'dzi tu guunn tu nin zie'gadziiba chi'h zi yihca tu guunn tu? <sup>4</sup> ¿Ta lliaa' zi bati'dxiloh tu guelrza'cazii pur guelriachii sto' xteenn tu? Per ¿xa gaca garia'caa lliaa' zi bati'dxiloh tu guelrza'cazii chi? <sup>5</sup> Chin runi'hi Dxiohs Spíritu Saantu Ñi'h loh tu, chin ruhnn Ñi'h milahgru nez loh tu, ¿xa ruhnn Ñi'hn? Ayi ruhnn Ñi'hn laasii ruhnn tu ziga nin caa loh lehyi, sino que laasii riachii sto' tu xcweenta nin bihn dxiahga tu.

<sup>6</sup> Guehtu xtaada guldoo' nu'h Abrahn gwachii sto' ba xchi'dxyi Dxiohs, ni'chin nin guca'ha Dxiohs la'h ba ziga tuhbi bwiinn nin nayaa lasto' ñi'h, <sup>7</sup> ni'chin gulgahcabwa' dee': Garaa ra' nin riachii sto' ra' ñi'h xchi'dxyi Dxiohs, rñi' Dxiohs naa ra' ba llii'n guehtu Abrahn. <sup>8</sup> Galohyi naann Dxiohs xcweenta guelriachii sto' zusiaa Ñi'h lasto' ra' bwiinn nin ayi naa ra' bwiinn Israel, ni'chin nin rahbi Ñi'h loh guehtu Abrahn: “Garaa ra' bwiinn guidxyiyuh zahcataa'yi xcweenta lu'h.” Dxyi'dxyi ra' rii' gucah loh dxihsi ra' nin guhca galoh, hasta



caa xchi'dxyi Dxiohs. <sup>9</sup> Ni'chin la'h ra' nin riachii sto' ra' ñi'h, nnah la'h Dxiohs cayahcaneé la'h ra' ba ziga gahca guhcaneé Ñi'h la'h guehtu Abrahñ, nin gwachii sto' la'h Ñi'h.

<sup>10</sup> Garaa ra' nin riiyuhnn ra' sola ziga nin caa loh xlehyi guehtu Moisehs, ya naa ra' ba bwiinn dii ra' laasii squii' caa loh dxihñsi xteenn lehyi: “Garaa ra' bwiinn nin ayi guza'loh guunn ra' ziga nin ru-luu'yi lehyi, ziuu' dii ra' bwiinn ra' chi.” <sup>11</sup> Pwiñsi ayi chyú naa bwiinn nayaa nez loh Dxiohs sidela razo'badxiahga nu'h xcweenta lehyi, laasii squii' naa xchi'dxyi Dxiohs: “Sidela riachii sto' tuhbi bwiinn xchi'dxyi Dxiohs, bwiinn chi naa ba tuhbi bwiinn nayaa nez loh Dxiohs, nee nabahanee ba Dxiohs pur xcweenta guelriachii sto' xteenn ba.”

<sup>12</sup> Ya lehyi xteenn Moisehs ayi naan ziga chechii sto' bwiinn xchi'dxyi Dxiohs, laasii squii' rñi' loh lehyi: “Bwiinn nin guzo'badxiahga dxyi'dxyi ra' rii', zibahan ra' ba pur xcweentan.”

<sup>13</sup> Jesucristu bata'h Ñi'h la'hnu'h loh dii xteenn lehyi laasii la'h Ñi'h guhchi Ñi'h pur xcweenta xtií nu'h loh tuhbi yahga cruñzi ziga zi baria'caa Ñi'h ziga zi tuhbi bwiinn dii, laasii loh Xchiñsi Dxiohs caa squii': “Bwiinn dii ra', naa ra' garaa ra' nin rahchi rza'bina'hla loh tuhbi yahga.” <sup>14</sup> Dee ra' guhca ra'n tin guya'loh xcweenta guelruhñntaa'yi nin bia'han dxyi'dxyi Dxiohs loh guehtu Abrahñ tin pur xcweenta Jesucristu guica'ha ra' bwiinn nin ayi naa ra' bwiinn Israel ra' guelruhñntaa'yi chi; ya tin zi'chi za garaa ra' nu'h pur xcweenta guelriachii sto' rachica'ha ra' nu'h Spíritu Saantu nin bia'han dxyi'dxyi guixe'hla Dxiohs para la'h

ra' nu'h.

*Lehyi nee dxyi'dxyi nin bia'han dxyi'dxyi Dxiohs loh guehtu Abrahn*

<sup>15</sup> Bwiitsi ra'n, la'n guñi' loh tu tuhbi dxyi'dxyi xcweenta bwiinn guidxyiyuh. Chin ziga tuhbi bwiinn ruhnn ba tuhbi dxihtsi tin dxia'han dxyi'dxyi ba cun stuhbi bwiinn, nicala bwiinn guidxyiyuh ra' ba, per chin ya bati'dxi firma garoopa ra' ba loh dxihtsi chi ayiru nuu chyu xa guunn para xi guicah ru loh dxihtsi chi nee nin ayiza nuu chyu guzia'tiin nin caa loh dxihtsi chi.

<sup>16</sup> Pwihsi naann nu'h, Dxiohs badi'hi xchi'dxyi Ñi'h nez loh guehtu Abrahn nee cun neezaa loh llahga ba, ayi guñi' Ñi'h llahga ra' guehtu Abrahn ziga loh ziahan ra' ba, sino que guñi' Ñi'h xcweenta tuhsi bwiinn, ya bwiinn chi naa la'hsi Jesucristu. <sup>17</sup> Dxyi'dxyi nin xclaa'dzihn guñi'n loh tu naa squii': Dxyi'dxyi nin bia'han dxyi'dxyi Dxiohs loh guehtu Abrahn guñi' Ñi'h loh ba chin caya'dxi zatahpa gaywa'h galdabi tsi'h yihza gadzihn lehyi loh Moisehs, tin la'h Moisehs bati'dxi lehyi rii' nez loh ra' bwiinn Israel. Per ayi bwi'hnn lehyi gahn ñucha'h dxyi'dxyi nin bia'han dxyi'dxyi Dxiohs loh guehtu Abrahn, laasii xchi'dxyi chi'h zi Ñi'h lasahca. <sup>18</sup> Pwihsi sidela herensi nin bia'han dxyi'dxyi Dxiohs loh guehtu Abrahn naan pur xcweenta xteen xlehyi Moisehs, pwihsi ayi xi herensi guhpa Abrahn loh Dxiohs; per ziga nnah la'h Dxiohs basia'hannee herensi la'h Abrahn laasii desde galohyi bia'han dxyi'dxyinee Ñi'h la'h Abrahn.

19 ¿Xi pur badi'hi Dxiohs lehyi nez loh guehtu Moisehs? Badi'hi Dxiohs lehyi laasii guza'bi duxa ra' bwiinn Israel loh duhlda, tin guhcabwa' ra' ba xa naa xcweenta xtuhlda ra' ba, gaduhbi nin ze'yalda dxyih nin dxi' nin naa Llahga Abrahn, laasii zi'chi bia'han dxyi'dxyi Dxiohs cun la'h Abrahn. Ya ziga lehyi xaanjla Dxiohs badi'hi lehyi la'h guehtu Moisehs, tin la'h ba guhca ziga tuhbi bwiinn nin rusia'lda dxyi'dxyi. 20 Tuhbi nin rusia'lda dxyi'dxyi ayi naa ba par tuhbi si bwiinn, per Dxiohs tuhsi naa Ñi'h.

### *Xcweenta lehyi*

21 ¿Ta guriincaa naa lehyi Moisehs loh dxyi'dxyi nin basia'han Dxiohs loh guehtu Abrahn? ¡Xa gacan zi'chi! Sidela ñachica'ha nu'h tuhbi lehyi nin rahca runi'hi guelnabahan, chi'chisihn xcweenta lehyi chi ñica'ha bwiinn guelnabahan nayaa, 22 per loh xchihtsi Dxiohs rñi' squii': Garaa ra' bwiinn nuu ñie'w loh duhlda, per tuhbi bwiinn nin chechii sto' ñi'h xchi'dxyi Dxiohs ziga gwachii sto' guehtu Abrahn, bwiinn chi guica'ha guelriachii sto' xteenn dxyi'dxyi xcweenta Jesucristu ziga bia'han dxyi'dxyi Dxiohs loh guehtu Abrahn.

23 Chin nagahdxi gadzihn xcweenta guelriachii sto' xteenn xchi'dxyi Jesucristu, chi'chi guna'zu ñie'w lehyi la'hnu'h loh duhlda; dxuuleeza chi'h zi nu'h garia'hcaa guelriachii sto' xcweenta xchi'dxyi Jesucristu. 24 Ni'chin nin naa lehyi ziga xmwehsu nu'h tin guluu'yin la'hnu'h neziuh nez loh Daada Jesucristu tin gusiaa Ñi'h xcweenta xtuhlda ra' nu'h cun guelriachii sto' xteenn xcweenta xchi'dxyi Ñi'h. 25 Per nnah ziga ya

nahpa nu'h guelriachii sto' xteenn xcweenta xchi'dxyi Ñi'h, ayiru chyú guichi'hn tuhbi mwehsu ziga lehyi.

<sup>26</sup> Laasii pur xcweenta guelriachii sto' garaa tu naa tu llii'n Dxiohs xcweenta ziga naa tu tuhsi cun Jesucristu, <sup>27</sup> laasii garaa tu ziga gurohbañhsa tu loh xchi'dxyi Jesucristu, naa tu xpwiinn Jesucristu. <sup>28</sup> Ayiru xi guelrzaa' chuu tu nicala naa nu'h bwiinn Israel o bwiinn griehgu ra', o bwiinn nin gudoo'tii' ziga mooza ra', o bwiinn nin ayi naa mooza ra', ndxi'hw o gunna'h; laasii garaa ra' nu'h naa tuhsi nez loh Jesucristu. <sup>29</sup> Ya sidela naa tu xpwiinn Jesucristu, pwihsi naa tu lla'ha guehtu Abrahñ ya zica'ha tu ziga herensi nin bia'han dxyi'dxyi Dxiohs gudi'hi Ñi'h la'h guehtu Abrahñ.

## 4

<sup>1</sup> Dxyi'dxyi nin xclaa'dzihn guiñi'n loh tu naa squii': Nin rca'ha guelnaza'ca, chin naa bi biñi'n, naa bi ziga zi tuhbi mooza nicala xteenn bi gahca garaa nin naa xteenn xtaada bi. <sup>2</sup> Nuú tuhbi bwiinn nin rahpa la'h bi, nee nuú za tuhbi bwiinn nin rnabwa' xcweenta xixteenn bi, para hasta gadzihnyi dxyih nin baca'bwa' xtaada bi guica'ha bi nin gudi'hi xtaada bi la'h bi. <sup>3</sup> Ya zi'ca za rzahca ra' nu'h chin naa nu'h biñi'n; gyyuu' nu'h guhca nu'h mooza loh lehyi, gunabwa'n xi ni'ca ayi nuú guidi'hnn nu'h loh guidxyiyuh, <sup>4</sup> per chin bazaa' dxyih nin bazo'ba Dxiohs, baxe'hla Ñi'h Llii'n Ñi'h, guulaa Llii'n Ñi'h pur tuhbi gunna'h ya bi' Ñi'h ziga tuhbi bwiinn Israel nin nahpa bazo'badxiahga xcweenta lehyi. <sup>5</sup> Bi' Ñi'h squii' tin

bata'h Ñi'h la'hnu'h ziga naa nu'h bwiinn nin nuu lahtsinaa xteenn lehyi, tin zi'chi gaca guunnllii'n Dxiohs la'hnu'h.

<sup>6</sup> Per laasii ya naa tu llii'n Ñi'h, ni'chin baxe'hla Dxiohs Spíritu Saantu xteenn Llii'n Ñi'h tin cweezaa Ñi'h lasto' tu, ya la'h Ñi'h rñi' loh Dxiohs xcweenta nu'h: “Yu'bilu'h, Xtaada nu.” <sup>7</sup> Pwihsi naa ra' nu'h llii'n Dxiohs, ya ayiru naa ra' nu'h ziga mooza zi. Ya pur nin naa ra' nu'h llii'n Dxiohs, pwihsi zuni'hi Dxiohs guelnaza'ca la'h nu'h xcweenta Daada Jesucristu.

### *Riiu' Pahblu guelrzaa' pur xcweenta bwiinn Galacia*

<sup>8</sup> Pwihsi chin nagahdxi dxiu'nbwa' tu Dxiohs, nuu na'zu guelrusagui'hi xteenn ra' dxaan ra' nin nnaasto' tu naa Dxiohs la'htu per ayi Dxiohs ra' dxi'h ni'chi ra', <sup>9</sup> ni'chin nnah nin nu'nbwa' tu Dxiohs o nu'nbwa' Dxiohs la'htu, ¿xaalla cheezah chi'h tu loh ra' guelrusagui'hi nin guyuu' tu galoh chin guunn tu la'h ra' dxaan ra'? <sup>10</sup> La'htu zeezah-nee gahca tu rahpadaa tu loh dxyih ra', bwe'hw ra', bwe'hw ra' nin mahzi lasahca cun yihza ra' ziga caa loh xlehyi Moisehs. <sup>11</sup> Nuu guelnadxyi'bi lasto'n nnagah garia'caa gaca xtsi'na'hn nez loh tu dzi'n lliaa' zi.

<sup>12</sup> Bwiitsi lasaa' ra'n, rna'ba'hn loh tu gulgahca ziga pa'h na'h, laasii na'h gwachii sto'n xchi'dxyi Jesucristu ziga za gwachii sto' tu; ayi xi dzi'n dx-aaba baca'chiah tu na'h chin guyuu'huhn nez loh tu. <sup>13</sup> La'htu ya naann tu chin balu'yi'hn xchi'dxyi Jesucristu loh tu, bwi'hnnañin pur xcweenta tuhbi

gueldxyihdxyi nin basa'cazii na'h, <sup>14</sup> ya gueldxyihdxyi nin guhca'h'n, guhcan ziga tuhbi guelruti'dxiloh para na'h, per ayi pur ni'chi dxi'h ñibwe'he sto' tu na'h, sino que bwi'hnn tu na'h ziga zi tuhbi xaanjla Dxiohs, nee cun ziga zi na'h ñahca'h'n ziga Jesucristu. <sup>15</sup> ¿Xa guhca cun guelnasaa xteenn tu nin guhpa tu chi'chi? Per rñi'n loh tu, sidela ñibwe'he hasta bizloh tu ñuni'hi tu na'h, zi'chi ñuhnn tu; <sup>16</sup> yannah ¿la'hlaa rdxyi'chi tu laasii cañi'n dxyi'dxyi nin guchii loh tu?

<sup>17</sup> Nnah nuu ra' bwiinn ra' nin ruhnnzi ra' ziga nin zeezahnee lehyi nee ruhnnloh ra' ba zigazi nin ruca'h sto' ñi'h la'htu, per nin xclaa'dzi ra' ba naa gabwe'he ra' ba la'htu tin ayiru chechii sto' tu xchi'dxyi'h'n, tin chena'hla tu la'h ra' ba, tin guzo'badxiahga tu xchi'dxyi ra' ba. <sup>18</sup> Ayi guunn tu lligaaba riuu'llahna'h'n pur la'h tu. Pwihsi naa bwen guluu'yi snuhn ra' bwiinn balaaca ruca'sto' ra' ba la'h tu, per nahpa gacan cun gaduhbi sto' ra' ba nee nahpa gacan garaa dxyih, ayi chin zu'hsidxi'h'n nez loh tu. <sup>19</sup> Llii'n ra'n, xcweenta tu cagati'dxiloon guelrza'cazii ziga zi ruti'dxiloh tuhbi gunna'h loh trabahjw xteenn guelnazihdzi chin rahlaa llii'n ba; nahpa zu'ti'dxiloo ruhn guelrza'cazii hastayi chin guluu'yi tu canabwa' pa'ca Jesucristu la'n lasto' tu. <sup>20</sup> Malaayi ñuu' xa ñahca zu'h'n nezca tin guiñi'n loh tu xiilla stuhbi dxyi'dxyi, per ziga nnah zihtu nuu'huhn ayi rahcabwa'n xa ni'ca gu'nnahn lligaaba xcweenta tu.

### *Dxyi'dxyi xcweenta Agar cun la'h Sara*

<sup>21</sup> Gulguiñi' loon, la'h tu nin xclaa'dzi guunn ziga nin caa loh dxihtsi xteenn lehyi, ¿tayi rah-

cabwa' tu, tayi rihn dxiahga tu xi caa loh lehyi?  
<sup>22</sup> Guldxihn dxyi'dxyi squii' caa loh lehyi. Guyuu' chiohpa llii'n guehtu Abrahñ; tuhbi bi naa llii'n gunna'h nin guhca xmooza ba nin biria'hlah Agar, stuhbi bi naa llii'n gunna'h nin naa che'hla pa'caa ba nin biria'hlah Sara. <sup>23</sup> Ya llii'n gunna'h nin naa xmooza ba guulaa llii'n gunna'h chi laasii xigaaba ba guhca ziga guyuu' llii'n xmooza ba, per ya ziga llii'n che'hla pa'hcaa ba guulaa bi laasii zi'chi bia'han dxyi'dxyinee Dxiohs la'h Abrahñ.  
<sup>24</sup> Dxyi'dxyi xcweenta ra' gunna'h ra' rii' naa ziga dxyi'dxyi nin ruluu'yi. Gunna'h ra' rii' naa ziga chiohpa dxyi'dxyi nin bia'han Dxiohs: Agar naa mooza; mooza ca naa ziga dxyi'dxyi nin bia'han dxyi'dxyi Dxiohs cun Moisehs loh dahan nin laa Sinaí, nee llii'n mooza ca guyuu' ya xpiñih bi gaca ra' mooza xteenn lehyi. <sup>25</sup> Agar naa ziga dahan Sinaí nez loh ra' guihdxyi xteenn Arabia, per guihdxyi Jerusalehn naa ziga dahan Sinaí laasii nnah ri'chi naa hasta rii ra' bwiinn Israel cun llii'n ra' ba, zeenee ra' ba lehyi. <sup>26</sup> Per guihdxyi Jerusalehn nin nuu dxibaa' ayi naan ziga tuhbi mooza, ya la'hnu'h naa nu'h llii'nan. <sup>27</sup> Squii' caa loh xchi'dxyi Dxiohs:

Biaxhi, gunna'h nin ayi llii'n ñi'h; dxigah biaxhi yi'h nin ayi gaann lu'h loh guelnazihdzi xteenn ra' gunna'h nin riuu' ra' llii'n ñi'h,

laasii ziuu' ru llii'n gunna'h nin gule'he sto' che'hla ñi'h que gunna'h nin nuunee che'hla ñi'h.

<sup>28</sup> Bwiitsi ra'n, la'hnu'h naa nu'h ziga zi guehtu Isaac; naa nu'h llii'n guehtu Abrahñ pur dxyi'dxyi

nin bia'han dxyi'dxyi Dxiohs loh ba. <sup>29</sup> Chin guulaa llii'n gunna'h nin naa mooza, guulaa bi laasii lligaaba Abrahn guhca guyuu' bi sto' xmaah bi, per ya bacha'ga dxi'ldxi bi la'h nin naa llii'n pa'h che'hla Abrahn nin guulaa xcweenta dxyi'dxyi nin bia'han dxyi'dxyi Dxiohs cun la'h guehtu Abrahn, zi'chi za naa nnah. <sup>30</sup> Per ¿xi rñi' loh Xchihsi Dxiohs? Squii' rñi'n: “Babwe'hecaa gunna'h nin naa mooza cun llii'n ba, tin ayi guica'ha llii'n gunna'h nin naa mooza xquelnaza'ca xteenn lu'h ziga nin rca'ha llii'n gunna'h nin naa che'hla pa'h lu'h.” <sup>31</sup> Pwihsi bwiitsi ra'n, la'h ra' nu'h ayi naa nu'h ziga llii'n gunna'h moozazi, sino que naa nu'h llii'n nin naa che'hla pa'h guehtu Abrahn.

## 5

*Gulgui'hnn nadxiipa sto' tu loh guelriachii sto' xchi'dxyi Dxiohs*

<sup>1</sup> Gulgui'hnn nadxiipa sto' tu loh xchi'dxyi Dxiohs nin bani'hi Jesucristu la'hnu'h laasii guchii pa'h babwe'he Jesucristu la'h ra' nu'h loh xcweenta lehyi; basiapitii Ñi'h xtuhlda ra' nu'h chin gwachii sto' nu'h xcweenta xchi'dxyi Ñi'h, ni'chin nin ayiru guibia'garii tu loh guelrsi'naa'ha xteenn lehyi.

<sup>2</sup> Na'h Pahblu rñi'n loh tu; sidela la'htu chuu tu bwa' tihxi tu ziga nin caa loh lehyi, chi'chi ayiru xi gallu'yi chechii sto' tu xchi'dxyi Jesucristu. <sup>3</sup> Rñi'zahn stuhbi bwelta loh tu; garaa ra' bwiinn ra' nin xclaa'dzi chuu bwa' tihxi ñi'h, nahpa guzo'badxiahga bwiinn chi guunn ba garaatii' ziga nin rñi' loh lehyi xteenn Moisehs. <sup>4</sup> Pwihsi



la'htu nin xclaa'dzi guunn dzi'n ra' nin caa loh lehyi tin chapitii xtuhlda tu, pwihsi la'htu ya naa tu bwiinn ra' nin biria'caa loh xneziuh Jesucristu, nee cun loh guelruca'h sto' xteenn Dxiohs. <sup>5</sup> Pwihsi la'hnu, pur xcweenta Spíritu Saantu nee cun xcweenta guelriachii sto', naann pa'h nu gudxihlli Jesucristu xcweenta xtuhlda ra' nu loh cruhzi, nee cayiinloh nu zi' pa' za Jesucristu stuhbi tin guni'hi Ñi'h guelnabahan za'ca nin naa para tu'pazi la'hnu, <sup>6</sup> laasii la'h ra' bwiinn nin riachii sto' ra' ñi'h xchi'dxyi Jesucristu ayi zeena'hla ra' ba cweenta ziga gu nuu o ayi ra' ba bwa' nin laa circuncisión tihxi ra' ba; nin lasahcasihn chuu guelriachii sto' xteenn Dxiohs la'n lasto' ra' ba. Ya guelriachii sto' riil ruhnn para rbahan ra' ba cun guelnadzii'hi lasaa'.

<sup>7</sup> Per ¿a'gaa zeezah za'ca dxi'h tu? ¿Chyu ni'ca basiahchi sto' tu para basaa'n tu xcweenta dxyi'dxyi nin naa guchii? <sup>8</sup> Gulgahcabwa', ayi ze' ni'ca pur lah Dxiohs nin rbwihdxyi la'htu, <sup>9</sup> nee ayi dxia'lda sto' tu tuhbi bwiinn nin ruluu'yi xchi'dxyi lehyi loh tu naa ba ziga levadura nin riahchi cohba harihn. <sup>10</sup> Na'h rgu'bwa'pa'hn xcweenta tu nez loh Dxiohs, ni'chin nadxiipa sto'n la'htu; la'n naann ayi chyu la'htu naa nin chechii sto' ñi'h stuhbi dxyi'dxyi, per bwiinn nin nusagui'hyi la'htu zusa'cazii Dxiohs la'h ba, nicala chyu chi'h zi naa ba.

<sup>11</sup> Pwihsi ziga na'h bwiitsi ra'n, sidela na'h zeezah gahca nugati'chihn dxyi'dxyi xcweenta bwa' nin riuu' tihxi bwiinn, pwihsi ayi ñiuu' llahn sto' ra' bwiinn Israel na'h, ya zi'chi ayi ru chyu la'htu ñachii sto' ñi'h xcweenta ziga gudxihlli Je-

sucristu xtuhlda ra' nu'h loh cruhzi, per zi'chi naa xigaaba ra' ba. <sup>12</sup> Pwihsi, bwiinn ra' nin nugasagui'hi la'htu para chuu tu bwa' nin laa circuncisión, ¡malaayi guchyuu'gatii' ra' ba hasta naa ra' ba ndxi'hw!

<sup>13</sup> Laasii la'htu bwiitsi lasaa' ra'n gudihdxyi Dxiohs la'htu tin ta'h tu loh lehyi pur xcweenta Jesucristu, per gulguia'hxgah ayi guica'ha si tu dxyi'dxyi ra' rii' bachi'h chi'chi so'baloh guunn tu nin chi'h zi nin xclaa'dzi tihxi tu; mahzi nin guunn tu gulgahca nadzii'hi lasaa' ziga tuhbi tu ziga stuhbi tu, <sup>14</sup> laasii garaa ra' dxyi'dxyi nin caa loh lehyi tuhsi dxyi'dxyi rii' naa nin ruluu'yi: “Guhca nadzii'hi lasaa' bwiinn ziga zi nadzii'hi lu'h yi'h gahca.” <sup>15</sup> Per sidela la'htu rdxihldxi tu, rahwyaa' tu lasaa' tu, rahw tu lasaa' tu, ¡gulgahcabwa'! Ayi la'h gahca tu guñihchi tu lasaa' tu.

*Xcweenta nin rza'bi sto' ra' bwiinn nee guelnabahan nin rudi'hi xchi'dxyi Dxiohs*

<sup>16</sup> Rñi'n loh tu, gulguibahan ziga ruluu'yi xchi'dxyi Dxiohs cun Spíritu Saantu xteenn Ñi'h, tin zi'chi ayi guibahan tu cun xcweenta ziga nin xclaa'dzi tihxi tu, nee cun ziga chi'h zi nin naa xigaaba tu, <sup>17</sup> laasii nin naa lligaaba xteenn bwiinn naa nin rdxyi'chi loh xigaaba xteenn Spíritu Saantu xteenn Dxiohs. Zi'chi za xigaaba xteenn Dxiohs ayi naan tuhbiloh cun lligaaba xteenn bwiinn, ni'chin nin ayi nuu guunn tu dzi'n nin xclaa'dzi tihxi tu guunn tu. <sup>18</sup> Per sidela cayuhnn tu nin ruluu'yi Spíritu Saantu Dxiohs la'htu, chi'chi ayi nahpa guunn tu ziga nin caa loh lehyi.

19 Guyaa dxiu'nbwa' ra' bwiinn xa ni'ca naa dzi'n nin ruhnn ra' bwiinn ra' nin ayi nu'nbwa' la'h Dxiohs; ruhnn ra' ba guelgubwihlli, rie'suh yihca ra' ba cohsa dxaaba, nee cun ziahan ru nin rnaaba tihxi ra' ba guunn ra' ba, 20 raann ra' ba dxaan ra', cun ruhnn ra' ba dzi'n bidxa'ha, riuu' llahn sto' ra' ba, rwa'ha dxaaba loh lasaa' ra' ba, rcha'gadxihldxinee lasaa' ra' ba cun naa ra' ba bwiinn nii ra', nee ayi guinagahn tii' rdxyi'chi ra' ba, nee ria'loh lasaa' ra' ba cun rlaa'ha lasaa' ra' ba, cun rbahchixchii ra' ba partidu ra'. 21 Naa ra' ba nin rza'bi sto' xixteenn lasaa' ra' ba, bwiinn gwaa' bwiinn nin rca'nzaa za'bi, nee ziahan ru dzi'n ra' ruhnn ra' ba; pwihsi ziga la'n guñi' la desde galoh, garaa ra' bwiinn ra' nin naa ra' squii' ayi nuu chu'tii ra' ba loh guelrnabwa' xteenn Dxiohs. 22 Per xtsi'n Spíritu Saantu xteenn Dxiohs naa guelnadzii'hi lasaa' ñi'h, guelriahxi sto', guelrbwihdxyii sto', guelpaseensi, guelralahsa sto' lasaa' ñi'h, guelnaza'ca cun chyu chi'h zi bwiinn, guelnagu'dzi sto', guelriachii sto', 23 guelnado' laadzi, cun guelrnabwa' loh sto' nu'h cun nin xclaa'dzi tihxi nu'h guunn. Ayi nin tuhbi xcweenta lehyi nin ruxi'n guunn ra' bwiinn loh lasaa' ra' dzi'n ra' rii', 24 per la'h ra' nin ya gwachii sto' ra' ñi'h xchi'dxyi Jesucristu ya la'h ra' ba bachyuu'ga ra' ba loh garaa ra' duhlida nin xclaa'dzi tihxi ra' ba guunnan. 25 Pwihsi rbweeza Spíritu Saantu sto' nu'h, pwihsi zi'chi za chyu guibahan ziga rnabwa' Spíritu Saantu guibahan nu'h. 26 Ayi gaca nu'h bwiinn nayaachi, ayi guidxyi'chinee lasaa' nu'h, nin ayi gaca nu'h bwiinn nin rza'bi sto' xixteenn lasaa' ñi'h.

## 6

*Gulgahcaneé la'h ra' lasaa' tu ziga tuhbi ziga stuhbi ra' ba*

<sup>1</sup> Bwiitsi lasaa' ra'n, sidela la'htu rdxeela tu tuhbi bwiinn lasaa' tu nin biaaba loh xiilla duhlda, la'htu nin ya rahcabwa' xa naa xcweenta xchi'dxyi Dxiohs gulguiñi'nee la'h bwiinn chi, nee gulgahcaneé la'h ba tin garia'h ba loh duhlda; gulguiñi' loh ba cun dxyi'dxyi naguu'dzi'hngah, nee gulguia'h dzi'tsi tin ayi nagah nee la'htu dxiaaba tu loh duhlda. <sup>2</sup> Gulgadi'hi nin rchi'hñ ra' lasaa' tu; gulgahcaneé la'h ra' ba tin zi'chi guunn tu guza'loh tu garaa ra' dxyi'dxyi ra' nin naa xlehyi Jesucristu.

<sup>3</sup> Laasii nin ruhnn lligaaba nuu chyu naa ba; bwiinn chi ayi chyu naa tii' ba, rusagui'hi ba la'h gahca ba. <sup>4</sup> Tuhbigah tu gulcuu'bwa' xa naa xtsi'n tu tin gwa'ha tu gu xnehza naan. Ya zi'chi ziin-nasaa lasto' tu pur xcweenta nin galuu'yi xtsi'n tu, ya ayi xtsi'n dxi'h stuhbi bwiinn, <sup>5</sup> laasii tuhbigah ra' bwiinn chebiiga nez loh Dxiohs tin guti'dxi cweenta ra' ba xi bwi'hñ ra' ba.

<sup>6</sup> Bwiinn nin cagasi'dxi xchi'dxyi Dxiohs, nahpa gacaneé ba bwiinn nin ruluu'yi la'h ba; gudi'hi ba nuhñzi xixteenn ba la'h bwiinn nin ruluu'yi la'h ba.

<sup>7</sup> Ayi gusagui'hi tu la'h gahca tu; ayi nin tuhbi nin guunn gusagui'hi la'h Dxiohs. Nin ruhnn biñih tuhbi bwiinn ni'chi dxi'h naa li'hñ nin rutiaa'ha ba.

<sup>8</sup> Per tuhbi bwiinn nin guunn dzi'n cweenta tihxi ñi'h, ya chin gadzihñ dxyih nin guica'ha ba guelnaza'ca, ziñihchiloh tihxi ba nee ayi chuu ba

loh xquelrnabwa' Dxiohs; per sidela tuhbi bwiinn guunn dzi'n nin badi'hi Spíritu Saantu Dxiohs la'h ba, chin guica'ha ba guelnaza'ca, neezaa guelnabahan nin naa para tu'pazi guica'ha ba. <sup>9</sup> Ni'chin nnah ayi chyu gusaa'n loh dzi'n za'ca tin chin gadzihn dxyih nin dxi' guelnaza'ca, neezaa la'hnu'h gachica'ha ra' nu'h tuhbi guelnaza'ca roo'. <sup>10</sup> Ni'chin cada chin rahldaaguzuh, gachidxiaacanee nu'h nee gachidi'hnn nu'h bwen la'h garaa ra' bwiinn, nee mahzi ru para la'h ra' bwihtsi lasaa' ra' nu'h nin riachii sto' ra' ñi'h xchi'dxyi Jesucristu.

*Luulchima ra' dxyi'dxyi xteenn Pahblu nee cun luulchima za guelrgahpaDxiohs xteenn ba*

<sup>11</sup> Gulguia'ha nali'hi lehtra nin cagaca'hn loh tu cun naa'hahn. <sup>12</sup> Garaa ra' bwiinn ra' nin riuu' sto' ñi'h guunn nin xclaa'dzi tihxi ra' ba gaca, la'h ra' ba nin xclaa'dzi chuu tu tuhbi bwa'; ruhnn ra' ba squii' laasii ayi xclaa'dzi ra' ba guti'dxiloh ra' ba guelrza'cazii xcweenta nin guchah Jesucristu loh cruhzi. <sup>13</sup> La'h ra' bwiinn ra' nin nuu bwa', ayi ruhnn ra' ba garaa ra' nin caa loh lehyi, per xclaa'dzi ra' ba chuu tu bwa' chi tin zi'chi guunn nayaachi ra' ba la'h ra' ba bwi'hnn gahn guyuu'tii bwa' chi tihxi tu, <sup>14</sup> per na'h ayi xclaa'dzihn chuu guelnayaachi sto'n xcweenta ziga cohsa ra' chi, sino que ziga naa xcweenta nin guchchi Daada Jesucristu loh tuhbi cruhzi, pwihsi pur la'h xcruhzi Jesucristu garaa ra' cohsa dxaaba xteenn guidxyiyuh guñihchiloh ra'n para na'h, ya para ziga la'h ra' Zahn naan ziga nin guñihchiloh para la'h ra'n. <sup>15</sup> Laasii sidela naa nu'h tuhsi cun

la'h Jesucristu, nicala nuu nu'h o nicala ayi chuu nu'h bwa' xteenn circuncisión, nin naa mahzi bwen gaca nu'h tuhbi bwiinn nin badxa'h ya biuu' ba ganaalla lligaaba cuubi ra' pur xchi'dxyi Jesucristu. <sup>16</sup> Garaa ra' bwiinn ra' nin nabahan ra' ziga ruluu'yi xchi'dxyi Jesucristu, zibwihdxyii sto' ra' ba xcweenta guelralahsa sto' xteenn Dxiohs, nee cun neezaa la'h ra' bwiinn Israel ra' nin gwachii sto' ra' ñi'h xchi'dxyi Jesucristu zahpa ra' za ba guelnasaa.

<sup>17</sup> Ayiru guunn tu llahn na'h nnah loh delaanta; laasii sehn ra' xteenn bwa' nin nuu ti'xihn rluu'yi naan tuhbi xmooza Jesucristu.

<sup>18</sup> Bwiitsi lasaa' ra'n, la'h Daada Jesucristu guunntaa'yi yihca tu. Zi'chi gaca pwihsi.

**Xchi'dxyi cuubi dxiohs nin bie'galuu'yi daada  
Jesucristu (El Nuevo Testamento en el  
zapoteco de Chichicapan y en español)  
New Testament in Zapotec, Chichicapan  
(MX:zpv:Zapotec, Chichicapan)**

copyright © 1990 Wycliffe Bible Translators, Inc.

Language: Zapotec, Chichicapan

Translation by: Wycliffe Bible Translators, Inc.

Zapoteco, Chichicapan [zpv], Mexico

**Copyright Information**

© 1990, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Chichicapan

**© 1990, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

f751ae13-0cd1-54fd-8c16-86718fb9cd5b